

INUIT ATAQATIGIIT

INATSISARTUNI



UKA 2015/93
18. november 2015
Peter Olsen

Folkehøjskolet pillugit oqallinnissamik siunnersuut. Folkehøjskelinik siunnerfinnik isumaliuutersuutit toqqammavigalugit folkehøjskolet ingerlatsiinnarnissaat anguniarlugu politikkut qanoq ikorfartuisinnaavugut? Politikkikkut iliuusissat suut aqutigalugit tunngaviusumik periusissatut toqqammavissat ersarinnerusut qanoq suliniutissat ingerlanneqarsinnaappat, matumani folkehøjskolenik isumaliuutersuutinik toqqammaveqarnerit anersaakkut tunngaviusut qaffassarneqarsinnaappat?

(Inatsisartunut ilaasortaq Sara Olsvig, Inuit Ataqatigiit)

Inatsisartunut ilaasortap Sara Olsvigip Inuit Ataqatigiinneersup folkehøjskolit pillugit oqallinnissatsinnik siunnersuutaanut, matumuuna Inuit Ataqatigiiniit imatut oqaaseqaateqassaavut.

Siullermik Sara Olsvigimut qujanarujussuaq oqallisssiamut uunga nuannersumut pissanganartumullu, qilanaarpugullu oqalliseqataanissatsinnut.

Naluneqanngitsutut nunatsinni folkehøjskoliuteqarpugut marlunnik; siulleq Knud Rasmussenip Højskolia Sisimiuniittooq aappaattullu Qaqortumiittooq Sulisartut Højkoliat.

Knud Rasmussenip Højskolia

Knud Rasmussenip højskolia 1962-mi atoqqaartinneqarsimavoq, issittumilu ilisimasassarsiortartorsuup tusaamasap Knud Rasmussen-ip aqqa tassunga højskolemut.atsiunneqarsimalluni.

Oqaluttuarisaanerput kulturerpullu – tassa inooriaaserput pillugit ilinniarfissatut pikkorissartarfissalutullu pilersinneqarsimalluni. Ullumikkullu ulluinnarni Inuunerup Ilinniarfianik aamma taaneqartalernikuusoq amerlanerit nalussagunannilaat.

1977-mi højskole immikkoortortaqarfittaarpoq tassalu arnat ilinniarfiat; kalaallisuliornermik assessorermullu tunngasunik sammisaqtunut ilinniarfissatut pilersinneqarsimalluni.

Aasakkut unnuisarfittut atorneqarsinnaasarsimalluni. Piffinni nutajunerusuni KRH Sisimiuniittooq ingerlalluuarsimasutut oqaatigineqarsinnaavoq atorluarneqartarsimaqaarlu; Augustimiit Decemberimut aammalu januarimiit Majip tungaanut ilinniartoqartalernikuulluni, taassuma saniatigut ilaqtariit angagajoqqaallu højskolertinneqartarlutik aammalu Sorlak højskolelik atuilluartartuusimalluni.

Sulisartut Højskoliat

Sulisartut Højskoliat 1977-mi aallartippoq Qaqortumi. Naatsumik oqaatigalugu sulisartut højskoliat tassaalluni, sulisartoqarneq pillugu tunngavigalugulugu qaammarsagaaffik, pikkorissartarfik nukissamillu aallertarfiusimalluni.

Taakku højskolit marluk, inuaqatigiit iluanni pingaaruterujussuartut inissismanikuupput, kinaassutsitsinnullusooq kulturitsinnulllu ilanngussimallutik, ilisarnaataallutillu; inuppalaassuseq aallaavigalugu – inuppalaassuserlu anersaaralugu pingaartillugulu ilinniartitseriaaseq – ingerlatseriaaseq imaluunniit Qaammarsaaneq!

Inuaqatigiit qaammarsarneqarnissaat højskolit taakku marluk siunertarilluinnarpaat anguniagaannilu pingaarneresaalluni – inuppalaassuseq anersaaralugu toqqammavigalugulu ingerlatsineq qaammarsaanerlu.

Inuaat siulimik ileqquannik – inusiannik, kulturianillu paasinninngitsut, ilisimanngitsut atuinngitsullu tassaapput inuaqatigiit inuaqatigiittut inerartoqqissinnaangitsut, anersaakkullu piitsuusut.

Højskolit tamassa suliassaat ingerlassimasaallu. Inerartorneq qaammarsaanerlu.

Kisianni ullumikkut pissutsit qiviarutsigit assiliaq allarujuussuaq tessani takussavarput. Ajoraluartumik højskolit ingerlatsinerat qangatut ikkunnaarsimavoq. Allanngorsimasutut oqaatigineqarsinnaangorsimagunarput.

Ullumikkut højskolit aningaaasaqarniarnikkut erloqinartorsiulersimapput, ima erloqinartorsiortigalutik allaat pilersinneqarnerminni anguniagaasoq anersaajusorlu, inuppalaassuseq aallaavigalugu ingerlatsineq qimanneqaleriartuaarsimalluni.

Tamanna uggornarluunnarpooq ajuusaarnaannarani akuersaaruminaappoq!

Qangaanerusoq højskolit misilitsiffiunngillat soraarummeerfiunerlu ajorlutik. Inuttut inerikkiartornissaq, alloriaqqissinnaaneq, qaammarsarneqarsinnaaneq pingoartinneqarnerpaasimallutik "atuartitsinermi".

Ukiumut højskolinut aningaaasaliissutaasarsimasut ukiorpassuarni allangortinnejarsimannngillat. Tamatuma kingunerisimalerpaa, ajoraluartumik, ullumikkut højskolit ingerlatseriaatsiminnik allangorttsisariaqalersimallutik. Anersaaq aallaaviusoq qimanneqalersimallunilusooq.

Ingerlatsinermut aningaaasartuutit matusinnaajumallugit aningaaasanik isertitsiffiusinnaasunik assigiinnitsunik aaqqissuussiniartalersimapput, soorlu ingerlariaqqissutaasinnaasunik atuartitsinerit pikkorissaanerillu misilitsinnertallit,

Aningaasassarserusunnerlu ima atsigilersinnaasarpoq allaat hotelitut unnuisarfittut aamma atuuffeqalersinnaanermik eqqarsartoqalertarsimalluni misiliisoqartalersimallunilu.

Tamaattoqarsimappat tamanna ajuusaarnarpooq uggornarpoq akuersaaruminaapporlu. Tamanna siunertaanngilluinnaqqissaaraluarpoq.

Naatsumik oqaatigalugu ullumikkut folkehøjskoliutitta atugaat pitsavallaartorsuunngillat akuersaaruminaappullu – pitsaanerusarujussuuusariaqarput.

Folkehøjskoliutitta qanga, pingoartinneqarsimanerat ataqqineqarsimanerallu uterteqittariaqarparput

Eqqartoqqittariaqalerparput, ullutsinni højskoliutigunuku suniarigut? Qanoq piniarpagut? Qanorlu ingerlariaqqissagut? Højskolit qanoq ittut pilersissavagut? Højskolit pillugit qanoq politikkeqassaagut? Il.il.

Suliffissaaleqinermik akiuiinarneq – Qaammarsaaneq!

Naluneqanngitsutut suliffissaaleqineq akiorniarlugu naalakkersuisut pilersaarutiminnut ilanngullugit Piareersarfiit 21 mio.kr missaanik amerlanerusunik aningaaasaliiffingiarpaat, Piareersarfiit aaqtigalugit suliffissaaleqinerup akiorneqarnissaa takorloorneqarsimalluni.

Piareersarfiup suliassaa pingarneq tassaaginnarsimalluni, suliffissaaleqisup meeqqat atuarfianik inaarutaarusumik naammassinninnissaa, ilinniaqqinnissaminut alloriaqqissinnaalersillugu.

Kisianni taava imaannilaq suliffissaaleqisut tamarmik pisariaqartikkaat Piareersaffinnissartik. Immaqa uffa suliffissaaleqisut ilaat allamik sammisaqarusukkuartut allatullu pisariaqartitsigaluartut.

Taakkuppullu allatut sammineqartariaqartut. Taakkupput meeeqat atuarfianitut ittumik atuartinneqartussaanngitsut, allatulli illuglit atuartinneqartussat, sammisassaqaqtinneqartussallu

Oqallinnerpullu tassunga sangutissagullu, taava ussernartorsiornartorujussuanngorpoq oqassanerluni, soormi taava højskolit suliffissaaleqinermut akiuniarluni pilersaarutitta ilaannut ilanngutiinnassanngilagut?

Højskolit suliffissaaleqinermut akiuniarluta pilersaarutitsinnut ilanngunniartigit.

Isumassarsiatsialaassagaluarpoq Piareersarfinnut aningaasaliissuterpassuit ilaasa højskolinut aammalu soorlu Timi Asimi-kkutut ittunut ingerlatsivinnut aningaasaliissutiginnarsinnaanginnerpagut?

Timikkut anersaakkullu ikorfartorneqarnissaminnik pisariaqartitsisut højskoligut atorlugit ikorsiiiffiginiartigit.

Højskolit, inuit timikkut anersaakkullu nukittorsarfissatut qaammarsaavissaatullu pilerseqqinniartigit nukittorsaqqinniartigillu. Højskolit anersaavat uterteqqitsigu; Inuunerup Ilinniarfia uterteqqitsigu!

Højskoli misilitsiffiussanngilaq. Højskoli pinngitsaaliissutaassanngilaq. Kiffaanngissuserli tunngavigalugu inuttut ineriartoqqinnissamut aqqutissiuussisarfiusaaq; inuppalaassuseq aallaavigalugu – inuppalaassuserlu anersaaralugu pingaartillugulu ilinniartitseriaaseq atorlugu – imaluunniit Qaammarsaariaaseq atorlugu.

Inuaat qaammarsarneqarnissaat siunertaralugu højskolit taakku marluk ingerlaleqqinissaat sulissutigisisariaqarpapput.

Inuit Ataqatigiinniit, Sara Olsvig isumaqatigilluinnarpapput oqarmat piffisanngortoq højskolit pillugit oqallinnissatsinnut, højskolit pillugit ingerlariaqqissinnatsinnut;

Højskoliutigut suniarpagut? Sumut atorniarpagut? Qanoq ingerlariaqqinniarpugut?
Tapersersuiniarpugut? Imaluunniit qanoq?

Inuit Ataqatigiit akissutissaq ataasinnaavoq; højskolivut nukittorsaqqittariaqarpagut, equeersaqqittariaqarpagut, uummarissaqqittariaqarpagullu.

Inatsisartunut ilaasortap Sara Olsvig-ip oqallisissiaq allaavigalugu højskolit pillugit oqallinnissamik siunnersortaanut qujalluta, taamatut oqaaseqarluta oqallilluarnissassinnik tamassi kissaappassi.

Qujanaq!